

Ilinniagaqartut 16-it 25-illu akornanni ukiullit kalaallisut oqaaseqartut, meeqqat atuarfiannit anillutik ilinniakkamik ingerlatsisinnaaneranguniarlugu, ilinniarfiit sorliit annertuumik aningaasartuuteqarfiunngitsumik isersinnaanermut piumasqaataasa ilinniartitsissutillu ilinniartunut kalaallisut oqaasilinnut nalimmassarneqarnissamut piukkunnaateqarnerannik misissuineramik UPA 2018-imi saqqummiunneqartussamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqtigiit)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Inatsisartunut ilaasortaq Mimi Karlsen (IA) ilinniagaqartut 16-inik 25-inik ukiullit, annermik kalaallisut oqaaseqartunut ilinniakkat sorliit immikkut naleqqunnersut misissuinissamik UPA 2018-imi Naalakkersuisut peqquneqarnissaat pillugu Inatsisartuni aalajangiiffigisassatut siunnersuuteqarnera pillugu Naalakkersuisut qutsavigaat. Isernissamut oqaatsitsigut piumasqaatit ilinniartitsissutillu naleqqussarnerat annertuumik aningaasartuuteqarfiunngitsumik pisinnaasoq siunnersuuteqartup naatsorsuutigaa.

Innuttaasut pingaartumik kalaallisut oqaasillit ilinniarnissamut periarfissaqarnerulernissaasa ukkanneqarnerunissaannut Naalakkersuisut isumaqataapput. Anguniagaq taanna Siumup, Inuit Ataqtigiit aamma Partii Naleqqap naalakkersuisooqatigiinnissamik isumaqatigiissutaannut ilanngunneqareernikuuvoq.

Inuutissarsiutinik ilinniarfiit aamma qitiusumik ilinniarfiit, matumani ilanngullugit KTI, Perorsaanermik Ilinniarfik, Paamiuni Imarsiornermik Ilinniarfik aamma Qaqortumi Niuernermik Ilinniarfik, ilinniartunut qallunaatoorsinnaanngitsunut neqerooruteqareerput. Suliniummut taamaattumut assersuutissaavoq suliarnut atuakkat ilai qallunaatuumiit kalaallisuumut nutsigaammata. Ilinniartitsissutit taakkua annerusumik atuartut ataatsimik oqaasillit atuartitsinerne malinnaanissaannut ilinniakkaminnillu naammassinninnissaannut periarfissaat nukittorsarpaat. Siunissami Kalaallit Nunaat imminut napatittoq nunatsinni inunnik isumalluutit aqutissiuutissagaat Naalakkersuisut anguniagaraat. Kissaatigineqartumi Kalaallit Nunaat imminut napatittup aqutissiuunneqarnissaa pingaarutilittut ilaasoq Naalakkersuisut Ilinniartitaanermut Periusissianni kiisalu Ilinniartitaanermut pilersaarut II-mi allanneqarsimapput.

Ilinniartitaanermut periusissiap pingaarnertut anguniagaraa, ukioqatigiit 70 %-iisa, 2015-imi meeqqat atuarfianni naammassisut, 35-nik ukioqalersinnatik inuussutissarsiutaasinnaasumik ilinniagaqarsimanissaq angussagaat. Ilinniartitaanermut pilersaarut II-p Ilinniartitaanermut

periusissiap ilusaa malippaa, ilinniartitaanermut tunngasuni anguniakkat nalunaarsorpai, suliniutinik malitseqartillugit anguniakkat angunissaannut ilapittuutaasunik.

Innuttaasut meeqqat atuarfiata kingorna ilinniakkamik naammassinnittartut amerlanerulersissagutsigit, sapinngisamik isumagisariaqarparput, ilinniarnep ataqatigiissumik aaqqissuuneqarnerata tamanut ilinniagaqarnissamut periarfissanngornissaa. Matumani ingammik ilinniagaqartunut, pingaartumik kalaallisut oqaasilinnut suliniuteqarnissaq pingaaruteqarpoq.

Taamaattumik Naalackersuisut siumut takorloorpaat, ilinniagassat sorliit, sullinniakkanut taakkununga naleqqussarneqarnissamut immikkut naleqqussinnaanersut.

Naalackersuisut taamatut oqaaseqarlutik aalajangiiffigisassatut siunnersuut akuerineqassasq inassutigaa.